

Incwadzi yathishela LiBhayibheli Lami Lekucala

Indlela yekufundzisa

Kutfufukisa lulwimi kwenteka nakusinyisiwe ekujuleni kwetibonelo letingito talolo lulwimi. Imizwa kanye nemdlandla webafundzi ngitona tihlangu ekukhuliseni lulwimi. Thishela/umsiti noma-ke umtali kubhekeke kutsi akhutsate futsi atjengise lugcozi kuko konkhe loko bafundzi labakukhulumako nalabakubhalako.

Angakabafundzisi bafundzi kumele babesebayati inhloso yekufundza sifundvo lesitsite, futsi asabachazele nangemigomo yaleso sifundvo.

Tindzaba leticuketfwe ngulencwadzi yebafundzi tifyinyetiwe kuze tilungele iminyaka yalabafundzi. Ungaphindze ubafundzele indzaba lephelele eBhayibhelini kuze bateyiva yonkhe noma-ke uyicoce yonkhe.

Emakhono

Kuletifundvo umfundzi utawukhona:

- Kusho bonkhamisa beSiSwati netinhlavu te-alfabhethi
- Kufundza nekubhala bonkhamisa beSiSwati neluhla lwetinhlavu te-alfabhethi
- Kubhala emagama ngetinhlavu te-alfabhethi letiniketiwe
- Kubhala imisho (sentences)
- Kuhumusha imifanekiso
- Kubala kufika e-50
- Kulalela tindzaba teLibhayibheli
- Kuphindza bacoce indzaba yeLibhayibheli labayivile
- Kulandzela imiyaletu
- Kudweba imifanekiso yetintfo letehlukene
- Kutfufukisa likhono lekusebenta nekukhalipha kwengcondvo

Landzela letimphawu!

Lemifanekiso lelandzelako yentelwe kusita thishela nebafundzi balandzele kahle imiyaletu yesifundvo.



Umsiti/Thishela uyafundza ngenhloso yekucacisa.



Buka – bafundzi babuka imifanekiso noma emagama, noma kokubili.



Ipeniseli – bafundzi bayabhala.



Kukhuluma – bafundzi baphindza emagama noma baphendvula imibuto.



Funa utfole – bafundzi kufanele bafune bate batfole tintfo noma emagama.



Ipeniseli lenembala – bafundzi bayadweba noma bafake imibala.



Kusebenta – ikhombisa umsebenzi webafundzi.



Kushaya lihlombe – bafundzi bashaya lihlombe.



Kukhorekitha – bafundzi bakhorekitha imphendvulo lengiyo kuletinengi.

Sifundvo 1: Ngimi lona

Lencwadzi ilungiselelwe bafundzi labaneminyaka lesihlanu kuya kulesitfupha. Batali nabothishela basontfos'kolwa bavumelekile kutsi basite bantfwana kufundza.

Kulesifundvo sekucala bafundzi banikwa litfuba lekufundza kutetfula ngeSiswati kuthishela/umsiti kanye nalabanye bafundzi. Loku kwentelwa kwekutsi labafundzi kanye nathishela wabo batane njengobe vele nangaphandle kwesikolwa emphilweni jikelele bantfu nabacala kuhlangu bayatetfula kute batane ngelisiko leSiswati. Kuhle kutsi kucale thishela kutetfula, bafundzi bamlalele kute bakhone kumlingisela phela. Nasebatetfulile-ke bafundzi nathishela sebalungele kusukela lomshikashika wekufundza. Thishela-ke asangatjela bafundzi ngamunye kutsi abadvwebe umfanekiso wabo ngepeniseli ephepheni, bahlobise nangemibala lekhetfwe ngibo. Lencenye yalesifundvo ihlose kungeta lugcozi ekufundzeni ngekutsi kube khona nabo labakwentako, futsi labatikhetsele kona. Nasebatidvwebile bafundzi kudzingeke kutsi bese babhala lamagama latsi "Ngimi lona" labawashito ngesikhatsi batefula.

Sifundvo 2: Bonkhamisa beSiswati netinhlavu te-alfabhethi

Inhloso yalesifundvo kufundzisa tinhlavu tekwakha emagama. Thishela/Umsiti kufanele asite bafundzi kutsi bacale bafundze kufundza letinhlavu bese bafundza emagama. Bafundzi kufanele futsi bawabhale onkhe amagama. Bafundzi abacale ngekufundza ngekuphindzaphindza bese babhala bonkhamisa labasihlanu beSiswati: **a, e, i, o, u**. Nasebakwente kahle loko bafundzi sebangachubeka bafundze luhla lwetinhlavu, nakhona lapha thishela abe nesineke angajaki ate abe nesiciniseko kutsi bafundzi sebayalandzela. Akakhumbule-ke thishela/umsiti bumcoka bekucala ngaletincane agcine ngaletito letinkhulu noma bofeleba.

Kungamsita thishela/umsiti kubeka bafundzi ngekweminyaka yabo. Labasebancane kakhulu, labasacala sikolwa, bangabhala kuphela bonkhamisa **a, e, i, o, u**. Thishela kufanele akhumbule-ke kutsi bafundzi labancane bafundza kahle ngekuphindzaphindza bate batinte. Futsi thishela akhumbule nekutsi injongo lenkulu lapha kuhlanyela lutsandvo lwekufundza incwadzi. Ngako-ke sineke sibalulekile kubafundzi labancane.

Sifundvo 3: Indalo yaNkulunkulu

Kulesifundvo bafundzi bafundziswa ngendalo yaNkulunkulu jikelele. Thishela/Umsiti akafundzise bafundzi kubukisisa imifanekiso, banake kakhulu emagama lahambisana nayo. Kufanele bawafundze onkhe lamagama, emva kwaloko bese babhala wona lamagama ngaletinhlavu temisindvo labanikwe yona:

Sibonelo:

Ndv – indvodza

Ny – inyanga

Ng – ingilozi

Sifundvo 4: Kudalwa kwa-Adamu

Nalokunje bafundzi etinkonzweni bahlaliswa ngeminyaka yabo, tishela/umsiti kuhle aciniseke kutsi bayasitana kufundza emagama lamasha. Kulesifundvo bafundzi bafundza ngekudalwa kwa-Adamu waseBhayibhelini. Lena-ke yindlela yekubangenisa esifundvweni seliBhayibheli lesisisekelo salencwadzi netifundvo letikuyo. Thishela/Umsiti uhlalisa bafundzi emathini balungele kulalela ngaphandle kwekuphatamiseka asabafundzela lendzaba yekudalwa kwa-Adamu. Thishela ubese ubuta bafundzi ngaleminye imininingwane yekudalwa kwa-Adamu. Lena yindlela yathishela/umsiti yekuniketa bafundzi litfuba lekusho loko nabo labakwatiko ngekudalwa kwa-Adamu. Nasebaphendvulile bafundzi thishela/umsiti asangabakhombisa luhlavu noma nkhamisa Aa ekucaleni kwalo lelibito la Adamu. Akhumbule thishela/umsiti bumcoka bekucala ngaloluncane luhlavu agcine ngalolukhulu (feleba: capital). Thishela asangedlula-ke bese utjela bafundzi kutsi bacabange bese bamnika lamanye emabilto, hhayi emagama

Iacala ngeluhlavu noma nkhamisa Aa. Asangasho nje kutsi lelinye lawo ngu Amosi noma Aroni. Buhle bawo lawa kutsi nawo asuselwa eBhayibhelini. Kwekugcina thishela angasho umthandazo acele lakudzingile kuNkulunkulu, aguce ashayanise timphama, njengoba kwentiwa nakuthandazwa. Bafundzi sebangamlandzela ngekusho yabo imithandazo yekucela lokutsite kuNkulunkulu, nabo bente njengobe entile thishela. Inhloso solo kugcizelela luhlavu noma nkhamisa Aa.

Sifundvo 5: Umkhumbi waNowa

Thishela/Umsiti: Bafundzi ababuke baphindze bakhulume ngemfanekiso wemkhumbi waNowa.

Vumela kukhulumisana ngako konkhe labakubonako kulomfanekiso.

Nyalo-ke thishela/umsiti ukhombisa bafundzi umushi wenkhosatana, bakhulume ngayo yonkhe imibala labayibonako kuwo. Kwekugcina thishela/umsiti akatjele bafundzi ngamunye kutsi abadwebe umushi wenkhosatana bahlobise ngayo yonkhe imibala lekuwo.

Thishela/Umsiti: Tjela bafundzi bahlobise emalanga la-40.

Sifundvo 6: Wancamuka zamcolo

Luphawu lweKubuka: Nika bafundzi litfuba lekubukisisa lemifanekiso lehambisana nekuphela kwazamcolo klulelikhasi.

Luphawu lweKukhuluma: Nyalo-ke vumela bafundzi bacoce namakhelwane ngalomushi wenkhosatana kanye naleminyane imifanekiso yekuphela kwazamcolo. Uvumelekile kubuta nekugcugcutela bafundzi kukhumbula labakwatiko ngalesihloko; inhloso kwenta bafundzi bakujabulele labakwentako lapha.

Luphawu lweKulalela: Hlalisa bafundzi ngendlela yekulungela kulalela. Nyalo-ke fundzela bafundzi livesi kuGenesis 8:16 ngalokwashiwo nguNkulunkulu kuNowa nakuphela zamcolo.

Luphawu lweKudvweba: Nyalo-ke nika bafundzi ngamunye ipeniseli labatawudvweba ngayo emacashata lakhomba ligama lapho ngasinye saletilwane sifanele siye khona umsebenti ekhasini 14.

Sifundvo 7: Kubalabala kuya-10

Luphawu lweKubuka: Nika bafundzi litfuba lekubuka tintfo tendalo letehlukene lapha kulelikhasi kute bati kahle kutsi kwentekani.

Luphawu lweKufundza: Nyalo-ke bafundzi ababale tintfo tendalo batehlukane ngetinhlobo tato. Ciniseka kutsi bafundzi bayakhona kubala kuya e-10! Kubala kufanele kufake netjani ekhatsi nalokunye-nje bafundzi lebangakusho, kungasita-ke nekutsi ubatjele bafundzi kutsi tjani abubaleki nekutsi buyafana nje nashukela, nemanti, njll/nalokunye.

Luphawu lweKubhala: Sesikhatsi-ke nyalo lapho khona bafundzi kufute bacatsanise lamalanga ekudala kunye nayo indalo phela.

Luphawu lweKulalela/neKukhuluma: Fundza letiphicwaphicwano kute bafundzi baphendvule ngalokubhekekile:

1. Nkulunkulu waphumula watfokotela umsebenti labesawentile. Kwakunguliphi lelo langa na?
2. Nkulunkulu wabona kutsi Adamu unesitunge wase umakhela umlibatisi wesifazane. Kwakunguliphi-ke lelo langa?
3. Wesilisa newesifazane baba bekucala kuphila emhlabeni. Kwenteka kuliphi lilanga lendalo loko?
4. Nkulunkulu wadala tonkhe tilwane ngatimbili – lesidvuna nalesisikati. Kwakunguliphi lelo langa lendalo na?

Letiphicwaphicwano tiyindlela yekuciniseka kutsi bafundzi bayakujabulela kufundza. Phela legenge ifundza kancono ngekudlala.

Sifundvo 8: Josefa nabomnakabo

Luphawu lweKubuka neKufundza: Vumela bafundzi babukisise lemifanekiso kulelikhasi.

Luphawu lweKukhuluma/nekulalela: Nyalo-ke bafundzi sebangaphawula ngako konkhe labakubonako kulelikhasi.

Luphawu lweKulalela: Fundzela bafundzi nayi indzatjana lekhuluma ngaJosefa nabomnakabo.

Sifundvo 9: Mosi utfolwa esitjeni elusentseni lwemfula

Luphawu lweKubuka: Vumela bafundzi babuke imifanekiso.

Luphawu lweKukhuluma: Nyalo-ke bafundzi abacoce nalabahleti nabo ngaloko labakubonako kulelikhasi. Lengcoco ingabese ifaka liklasi lonkhe. Ihloso yalomsebenti kusita bafundzi bacondze incikisi yeluswane kulendzatjana yaMosi.

Thishela/Umsiti: Fundzela bafundzi lendzatjana.

Luphawu lweKubuka: Kulelitfuba bafundzi abacatsanise letitfombe nemabito ato ngetemlomo.

Sifundvo 10: Mosi ukhipha bantfwana baka Israyeli eGibhithe

Luphawu lweKufundza: Mosi ukhipha bantfwana baka Israyeli ubakhipha eGibhithe.

Thishela/Umsiti: Bafundzi abafundze lendzatjana. Bafundzi kufanele bacedzele leminyane imisebenti lekulelikhasi lokufaka ekhatsi umdvwebo webuso lobujabulile nebuso lobunyukubele/lobutfukutsele (njengobe kubonwe kulelikhasi!).

Thishela/Umsiti uyakhutsatwa kutsi acale ngekukhutsata bafundzi kutsi bafundze, ikakhulu labo labakhonako. Thishela/Umsiti kubhekeke kutsi asite lapho bafundzi banebulukhuni. Inhloso kutsi bafundzi batfufuke bate bakhone kutifundzela ngaphandle kwelusito.

Luphawu lweKubhala: Tjela bafundzi bacedzele loluhlavu **Kk** kanye neligama **Kakhulu**.

Sifundvo 11: Imitsetfo yaNkulunkulu

Luphawu lweKubuka: Vumela bafundzi babukisise yonkhe lemifanekiso kulelikhasi.

Luphawu lweKukhuluma: Bafundzi asebacoce ngako konkhe labakubonako kulelikhasi.

Luphawu lweKufundza: Phindza ukhutsate bafundzi batinikele kufundzela likilasi lesicashunwa semitsetfo yaNkulunkulu.

Luphawu lweKulalela: Nyalo-ke fundzela bafundzi lemitsetfo lesihlanu.

Luphawu lweKubhala: Khutsata bafundzi babhale etikwalemigca lemacashata kute bacedzele kokubili luhlavu **LI** kanye nalo ligama **Lishumi**.

Sifundvo 12: Davide umelusi

Luphawu lweKulalela: Tekela bafundzi lendzatjana yaDavide umelusi (Isukela ku I Samuweli 16:18-23). Lomsebenti lona ulihlahandlele lekufundza lokulandzelako.

Luphawu lweKufundza: Bafundzi abacale bafundze lendzatjana yaJosefa umelusi ngamunye bese bafundza ngelikilasi basitwa nguwe.

Luphawu lweKubhala: Bafundzi ababhale luhlavu **Dd** nelibito **Davide** ngekucindzetela imigca yemacashata ngepeniseli njengoba kukhonjisiwe ngaphansi.

Sifundvo 13: Davide ulwa naGoliyathi

Luphawu lweKubuka: Tjela bafundzi babukisise lemifanekiso kulelikhasi.

Luphawu lweKukhuluma: Nyalo-ke bafundzi abacocisane ngaloko labakubonako kulelikhasi.

Luphawu lweKufundza: Fundza nebafundzi indzaba yaDavide nakalwa naGoliyathi.

Sifundvo 14: Danyela nemabhubesi

Luphawu lweKulalela: Fundzela bafundzi lendzaba yaDanyela nemabhubesi (Isuselwe ku Danyela 6:1-28).

Luphawu lweKubuka: Bafundzi ababukisise lemifanekiso kulelikhasi.

Luphawu lweKukhuluma: Gcugcutela bafundzi basho kutsi babonani kulelikhasi.

Luphawu lweKufundza: Nyalo-ke nika bafundzi litfuba lekutifundzela, bacale bafundze ngelikilasi bese bayatifundzela ngamunye.

Luphawu lweKubhala: Nyalo-ke bafundzi ababhale kuhlangu kwetinhlavu **Nkh** kanye neligama **Inkhosi**.

Sifundvo 15: Kutalwa kwaJesu

Luphawu lweKubuka: Bafundzi asebabukisise lemifanekiso kulelikhasi.

Luphawu lweKukhuluma: Bafundzi bacoca ngalabakubonako naloko labakwatiko ngekutalwa kwaJesu.

Luphawu lweKufundza: Bafundzi abafundze indzatjana yekutalwa kwaJesu.

Luphawu lweKubhala: Bafundzi ababhale kuhlangu kwaletinhlavu **Ng** kanye naleligama lelitsi **Ingilosi** ngekucindzetela ngepeniseli etikwemigca lemacashata.

Sifundvo 16: Tati taletsa tipho

Luphawu leKulalela: Tekela bafundzi lendzaba yetati netipho letatiletisa kuJesu.

Luphawu lweKukhuluma: Lapha-ke bafundzi asebasho konkhe lokunye labakwatiko ngetati netipho taJesu: loku kungafaka ekhatsi kulandzisa kwekutsi kepha tona tati leti taze tati njani ngekutalwa kwa Jesu, kuphawula nemifanekiso labayibonako ekhasini, njll/nalokunye nje.

Luphawu lweKubuka/neKubhala: Bafundzi asebente lomdlalo wekufuna batfole lamagama (kunalokubhalwe ephepheni lelehlukile!).

Luphawu lweKubuka/neKubhala: Bafundzi ababhale luhlavu **Nn** neligama **Nini**.

Sifundvo 17: Imifanekiso yekutalwa kwaJesu

Luphawu lweKubuka: Bafundzi ababukisise lemifanekiso kulelikhasi. Lapha kubhekeke kutsi nawe ube yincenye yalomsebenti kwentela kutsi utewubona nangabe kunebafundzi labadojako bese uyabelusa kuze bonkhe bawente lomsebenti.

Luphawu lweKukhuluma: Bafundzi asebasho kutsi yini labayibonako lapha. Buka lokucocisana ngekucikelela lapha kuze utewukhona kubona labakushiyile bafundzi bese uyakungeta-ke njalo.

Luphawu lweKubhala: Bafundzi nyalo ababhale konkhe labakubonako kulelikhasi. Nakekela kutsi wonkhe umfundzi uyabhala, usite labo labandzinga lusito. Kubhekekile kutsi ekugcineni bese uyawabhala wena lamagama wentele kwekutsi bafundzi babone kutsi abhalwa njani nekutsi kubhala kusukela ngesekuncele kuye kusekudla, nalokunye.

Sifundvo 18: Herodi ufuna kubulala luswane lolungu Jesu

Luphawu lweKulalela: Tekela bafundzi indzatjana yemitamo yenkhosi Herodi kubulala luswane Jesu.

Luphawu lweKubona: Vumela bafundzi babukisise lemifanekiso kanye nemagama ayo kulelikhasi.

Luphawu lweKukhuluma: Nyalo-ke tjela bafundzi basho kutsi babonani (gcugcutela bafundzi kutsi basho kutsi babuke kulenzaba yaHerodi afuna kubulala Jesu etincwadzini tabo nekutsi bakhulume nangaleminye imininingwane ngaHerodi naJesu labayatiko kodvwa lengaveli kulenzaba nasemifanekisweni).

Luphawu lweKufundza: Nyalo-ke bafundzi sebangafundza lendzaba yaHerodi afuna kubulala Jesu ngamunye.

Luphawu lweKubhala: Bafundzi ababhale luhlavu **Hh** kanye nelibito **Herodi** ngekucindzetela emapeniseli kulemigca lemacashata etincwadzini tabo, ekugcineni kwelikhasi.

Sifundvo 19: Jesu wenta umsebenti waNkulunkulu

Likhono leKulalela: Tekela bafundzi indzatjana nga Jesu nakenta umsebenti waNkulunkulu (Isuselwe ku Lukha 2:41-52).

Luphawu lweKubuka: Bafundzi asebabukisise lemifanekiso kulelikhasi.

Luphawu lweKukhuluma: Ngamela inkhuluma legcile kuloko bafundzi labakubonako kulelikhasi.

Luphawu lweKufundza: Gadza bafundzi batifundzela bubindze ngamunye ngamuye yona lendzaba etincwadzini tabo.

Luphawu lweKubhala: Bafundzi asebabhale luhlavu **Uu** nalomshwana **“Umsebenti waNkulunkulu”** ngekucindzetela ngepeniseli kuletheksthi lemacashata lasekugcineni kwelikhasi.

Sifundvo 20: Jesu usifundzisa kuthandaza

Luphawu lweKukhuluma: Asewukhutsate bafundzi bacale bacocela makhelwane bese batjela likilasi kwekutsi bona bathandaza nini futsi njani (cikelela kutsi awulimati tinkholo letehlukene tebafundzi lapha!).

Luphawu lweKufundza: Asebafundzi bafundze ngekuniketelana indzatjana yaJesu asifundzisa kuthandaza (Isuselwe ku Lukha 11:2-4).

Luphawu lweKufundza: Nyalo-ke bafundzi abacedzele lemisho ngekucindzetela emapeniseli kulemigca lemacashata entansi nelikhasi.

Sifundvo 21: Jesu uyahamba emhlabeni

Luphawu lweKulalela: Tekela bafundzi indzaba yekuhamba kwaJesu emhlabeni (Isuselwe ku Makho 16:19-20).

Luphawu lweKukhuluma: Nyalo-ke bafundzi asebasho loko labakubonako naloko labakwatiko ngekuhamba kwaJesu emhlabeni.

Luphawu lweKufundza: Asebafundzi baniketelane ngekufundza ngekuphimisa indzaba yekwenyuka kwaJesu emhlabeni.

Luphawu lweKubhala: Bafundzi asebacedzele loluhlavu **Zz** kanye nemushwana **“Uhlala eZulwini”** ngekucindzetela emapeniseli kulemigca lemacashata lasekugcineni kwelikhasi.

Sifundvo 22: Liculo

Luphawu lweKufundza: Fundza liculo kanyekanye nebafundzi.

Luphawu lweKukhuluma: Nyalo-ke hlabela leliculo nebafundzi.

Luphawu lweKubhala: Bafundzi abacedzele luhlavu **Cc** kunye nemushwana **“Liculo lelivangeli”** ngekucindzetela emapeniseli etikwemigca lemacashata ekugcineni kwelikhasi.